


www.BibleForChildren.org


Matius 26




Dauga' koi
noom ilio a ilio
ramean Paska,
Yesus nomae' mo na
Betania. Betania iya'a
dodongoan ni Lazarus men
ia potuo'i i Yesus noko daa
lapus. Mbaka' i Maria
notakamo nangawawa
toro sambande' liter
minamina' narwastu men mawangi
ka' alayo' tuu' a ilina. Maria
nintimbu' konmo minamina' iya'a
na sarat ni Yesus kasi ia sapui tia wuukna. Woon
minamina' iya'a simomoran longkop lalomna laigan.



Na lalomna sompulo' rua' murit ni Yesus isian sa'angu' mian men ngaanna i Yudas Iskariot. Ia nomae' nari tanaasna imam bo mongorookon i Yesus na ko'ona i raaya'a. Wiwi'na i raaya'a nobeles tuu' nongorongor men ia bantilkon i Yudas, ka' i raaya'a nontoon i ia se' bo taraionna doi'. Noko daa iya'a, ai Yudas nansarakmo salan men daa pore bo pongoroo konanna i Yesus.



Kasi murid-Na nangawawau koi
men ia posuu'kon i Yesus ka'
nontoropoti kumaanan Paska.
Pintanga' kumaan i raaya'a, Yesus
nangalamo roti, nobasukuur ka'
nungurumpi-rumpik, kasi
nongorookon na murid-Na ka'
norobu tae-Na, "Alamo ka' kaan,
ni'imo a wakang-Ku."



Noko daa koiya'a, Ia ala a
pinginuman tia anggur ka'
nobasukuur na Alaata'ala kasi
nongorookon i raaya'a ka' norobu
tae-Na, "Pinginum i kuu giigii' na
sasangkir kani'i. Gause ni'imo a
rara'-Ku men mamakadodor toonna
Alaata'ala. Rara'-Ku tonturo' bona
mian biai' bo
pangampuni
dosana
i raaya'a."



"Simon, Simon, imamat ini'imari! Ibiliis nama'ase'mo
mimitopongi i kuu giigii' kada' i kuu bi sida koi ota'na
gandum men nitaapi. Kasee Yaku' daamo
nansambayangkon i koo dako' imaawan rungku'.
Ka' sarataa i koo mule'konmo na Ingku', koo tio
mompopomoonggor utuus sa'angu' kaparasaya'an."




Ia simbati i Petrus taena, "Tumpu, yaku' maloos a noangku minsoop na tarungkuan ka' pate ruru-ruru' tii Kuu!" Kasee taeni Yesus, "Petrus, bantilkonon-Ku na ko'oom se' koo'po tia siok muntuturuu' ilio kani'i, koo noko porotolumo mangaan se' i koo sian poo'inti'i tii Yaku'."



Mbaka' notakamo i Yesus
tia murid-Na na tempat
men ngaanon Getsemani.
Kasi i Yesus norobu
na murid-Na tae-Na,
"Oruang karaa'ita. Yaku'
dauga' kumbaale'e mae'
sambayang." Taeni Yesus,
"Oo Papa, Tamang-Ku!
Giigii' upa ai Kuu a Pinginti'i.
Anui a repang-Ku kani'i na
wakang-Ku. Mau koiya'amo,
taasi' pingkira'-Ku
a lolo'on, kasee
pingkira'-Muu a lolo'on."




Mbaka' i Yudas nomae' mo na tempat iya'a ka' nangawawa sa'angu' pasukan surudadu tia toro pii dadagai Laiganna Alaata'ala men ia posuu' tanaasna imam tia mian Farisi. Raaya'a potowawa lantera', panso ka' pakakas bo poopapate. Kasi sa'angu' mian men nitakai indo'o nontotok ata'na Imam Moola' tamban nokopantas tilingana paraas uanan. Kasee i Yesus norobu tae-Na, "Aliamomo'!" Kasi i Ia nongkoyong tilingana mian iya'a ka' nengelesi'i.



Raaya'a nangarakopmo i Yesus ka' nangawawa na
laiganna Imam Moola'. Petrus nuntuntuni kasee
olo-oloa. Na tanga'na
tolodo iya'a isian mian
namatu'u apu ka' i
raaya'a no' umoruang na
tiku-tikumna apu iya'a.
Petrus uga' no'
umoruangmo
nintingola'
na ko'ona i
raaya'a.




Kasee i Petrus ninsasapu
taena, "Taasi'!" Sa'angu'
ata'na Imam Moola'
men poto'utusanna
mian men ia pantas i
Petrus a tilingana norobu
taena, "Taasi' uga' i yaku'
nimiile' i koo na taman iya'a
poopoololo' tii Ia?" Kasi i
Petrus ninsasapu soosodo.
Ka' noko daa koiya'a siok
nuntuturuu' mo. Mbaka'
no'umuarmo i Petrus ka'
nowiri tamban bolingongoton.





Giigii' mian men bo pungukumi iya'a
nokumekerermo, kasi nangawawa i
Yesus mae' ni Pilatus. Kasi i Pilatus
nimikirawar ni Yesus taena,
"Koomo a tomundo'na
lipu' Yahudi?" Ia
simbati i Yesus
tae-Na, "Koi nooro'o
men taemuu."



Pilatus mingkira' munguarkon i
Yesus. Mbali' iya'a, ia norobu
soosodo na mian biai' iya'a.
Kasee i raaya'a tongko'
mangkakaro', taena,
"Saliipkonmo a mian
kanono'! Saliipkonmo
a mian kanono'!"




Mbaka' i Pilatus nongorookonmo
i Yesus na ko'ona i raaya'a bo
saliipkonon. Raaya'a nangawawamo
i Yesus. Yesus no'umuarmo
pasa-pasa'an saliip-Na mae' na
tampat men ngaanon Lamasna
Takala'. (Na wurung Ibrani
ngaanna Golgota.)



Inda'a Ia nisaliipkon. Isian uga'
rua' mian nisaliipkon singkat tii
Ia, sa'angu' mian paraas kauri',
sa'angu' mian paraas
uanan ka'
i Yesus
na ola'na.



Toro jaam duablaas, nopintungmo a longkop libutan
iya'a pataka jaam tiga, gause ilio sianmo notaraang.
Toik men pongola'i olisna Laiganna Alaata'ala
kinoberakmo rua'. Kasi i Yesus
nangkakaro' boolak tae-Na,
"Papa! Na lima-Muu a
pongorookonan-Ku alus-Ku!"
Noko daa norobu koiya'a,
nopudul a noa-Na.



Mbaka' Yusuf, samba Arimatea,
sa'angu' mianna Mahkama Agama
men tongaan, men uga'
mempeperai Batomundo'
anna Alaata'ala,
nambaranikon noana
mae' ni Pilatus ka'
mama'ase'
biibii ni Yesus.

Kasi i Yusuf ningili
toik pobalun, ka'
noko daa iya'a, ia
taro'konmo a biibii
ni Yesus men na
saliip ka' nambalun
tia toik pobalun.




Pobalun iya'a, toik lenang a niwawau.
Kasi ia nomotokol biibii ni Yesus
na baleanan men nipa'atkon
na buu'na watu. Noko daa
iya'a, ia ningilinda'mo
watu ka' nongompodi
soopanna
baleanan iya'a.



Koi liilana, noko daa ilio batoropotan,
tanaasna imam tia mian Farisi
notakamo ni Pilatus, ka'
nambantil taena, "Tuan,
inau'onmai se' tempo i
tukang borek dauga'
tumuo', Ia isian
norobu tae-Na,
'Moko daa tolu'
ilio,

Yaku' bo
tumuo' soosodo."



"Mbaka' i raaya'a nomae'mo tia
surudadu, ka' i raaya'a
nensegelmo watu men
nongompodi
baleanan iya'a ka'
nandagai dako'
singaonna mian."



Sarataa noporus a ilio Sabat, na ilio
Minggu ma'ulop tuu', ai Maria
Magdalena tii Maria men
sambanaan nomae'mo
mengelego'i
baleanan
ni Yesus.

Ola-olan
nolili'onmo men
dodoa gause isian
malaa'ikatna
Tumpu nalau
ra'amari langit.



Ia notaka na watu men nongom
podi baleanan iya'a kasi
ningilinda' ka' no'umoruang
na wawona. Ka' surudadu
men nandagai baleanan
iya'a nolantutukanmo
layaon ka' dudusna
i raaya'a somo
koi mian lopus.



Kasee malaa'ikat iya'a norobu na
wiwine men iraando'o taena, "Alia
i kuu layaon, gause inti'ionku
se' i kuu mansarak i Yesus
men nisaliipkon iya'a.

Ia sianmo kani'i,
gause i Ia notuo'mo
soosodo koi men
Ia poko ngaanmo.

Mai

piile' a tampat men
nomotokolan i Ia."



Raaya'a liuliu namarerei baleanan iya'a
tia noa layaon ka' lewa' tuu' kasi
notumetende' mambantilkon na
murit ni Yesus.



Ola-olan i Yesus nomootuungi i raaya'a
ka' norobu tae-Na, "Tabea' na
ko'omuu." Raaya'a nangkarani'mo i
Ia ka' nangarangkot sarat-Na ka'
nonsoosa'.





Komburi'na ia nintipiile'mo na murit-Na men
sompulo' sa'angu' ira iya'a, na tempo i raaya'a
pintanga' kumaan. Ya'asi kasi ia sasala' i Yesus a
men sian laan parasaya, ka' men baroan a noana,
sian mamarasaya mian men noko pimiile'mo i Yesus
men notuo'mo soosoodo. Noko daa i Tumpu Yesus
norobu koiya'a na ko'ona i raaya'a, Ia
notoleengketmo waara'a na surugaa, kasi
no'umoruang paraas uananna Alaata'ala.



Gause Alaata'ala molingu'kon tuu'
mian na tano' balaki' kani'i, mbaka'
Ia nongorookonmo Anak-Na men
sa'a-sa'angu', kada' giigii' mian men
parasaya na Ko'ona sian silaka',
kasee mantausi tutuo'
men pore pataka
sidutu.



Roma 3:23 Giigii' mian mangawawau dosa, ka' sianmo mantaka Alaata'ala men kuasaan.

Roma 6:23 Waya'na dosa mase kolapusan, kasee Alaata'ala mantarai bulu-bulu na ko'onta tutuo' men pore pataka sidutu, gause moto kantang tii Kristus Yesus, Tumpunta.

Ibrani 9:27 Alaata'ala nangaan se' mian tongko' pensan lapus, ka' moko daa lapus kasi ukumion-Na.

Efesus 2:8,9 Gause kaporeanna Alaata'ala, Ia nansalamatkonmo i kuu men parasaya ni Kristus. Men koiya'a taasi' gause wawaumuu, kasee tongko' nantaraina Alaata'ala. Kuu nisalamatkon taasi' gause wawaumuu. Mbaka' sa'angu'po mian sian sida mompopodaa wakana.



Roma 10:9 Kalu i kuu mompotuutuu' tia nganga'muu
se' i Yesus iya'a Tumpu, ka' noamuu parasaya se'
Alaata'ala nomotuo'imo i Ia noko daa lapus,
mbaka' i kuu salamatkonon.

Roma 10:10 Gause noana mian tiodaa parasaya, kada' i
ia popokana'onna Alaata'ala. Ka' nganga'na tio
mompotuutuu' i Yesus, kada' i ia salamatkonon.

Yohanes 3:16,17 Gause Alaata'ala molingu'kon tuu' mian
na tano' balaki' kani'i, mbaka' Ia nongorookonmo
Anak-Na men sa'a-sa'angu', kada' giigii' mian men
parasaya na Ko'ona sian silaka', kasee mantausi tutuo'
men pore pataka sidutu. Alaata'ala nantatakakon
Anak-Na na tano' balaki' kani'i taasi' bo pungukum
mianna, kasee bo pansalamatkon.



1 Yohanes 5:11-13 Koi kani'imari a men potuutuu'onna
Alaata'ala: Ia nantaraikonmo tutuo' men pore pataka
sidutu na ko'onta', ka' tutuo' iya'a ringkat na
Anak-Na. Mian men mangalabot Anakna Alaata'ala
mantausi tutuo' men pore. Ka' mian men sian
mangalabot Anak, ia sian mantausi. Yaku' nuntulis
kani'i bo ko'omuu men parasaya na Anakna Alaata'ala
kada' i kuu minginti'i se' i kuu mantausi
tutuo' men pore pataka sidutu.



Matius 26-28; Lukas 22-24; Yohanes 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Balantak Bible (blz) © 2010, Wycliffe Bible Translators,
Inc. All rights reserved.

<https://live.bible.is/bible/BLZLAI/MAT/1>

©2026 Bible for Children, Inc.

www.M1914.org

www.bibleforchildren.org

